

四庫全書

集部

欽定四庫全書

御定歷代賦彙卷一百二十

草木

薺賦

晉  
夏侯湛

寒冬之日余登乎城跬步乎北園覩衆草之萎悴覽林  
果之零殘悲纖條之搗摧慙枯葉之飄殫見芳薺之時  
生被畦疇而獨繁鑽重冰而挺茂蒙嚴霜以發鮮含盛  
陽而弗萌在太陰而斯育永安性於猛寒差無寧乎煖

燠齊精氣於款冬均貞固乎松竹

園葵賦

宋鮑 昭

風暖凌開土昌泉動游塵曝日鳴雉依隴主人拂黃冠  
拭藜杖布蔬種平圻壤通畔脩直膏畝夷敞白莖紫蒂  
豚耳鴨掌溝東陌西行三畦兩既區既鉏乃露乃映勾  
萌欲伸叢牙將放爾乃晨露夕陰霏雲四委沈雷遠震  
飛雨輕灑徐未及晞疾而不靡柔草爰秀剛甲以解稚  
葉萍布弱陰競抽萋萋翼翼沃沃油油下歲蕤而被逕

上參差而覆疇承朝陽之麗景得傾柯之所投仕非魯  
相有不拔之利賓非二仲無逸馬之憂顧堇荼而莫偶  
豈蘋藻之薦羞若乃鄰老譚稼女嫗歸桑拂此葦席炊  
彼糗梁甃壺援醢曲瓢卷漿乃羹乃淪堆鼎盈筐甘旨  
菁脆柔滑芬芳消淋逐水潤胃調腸於是既飫徹盤投  
筯回小人之腹為君子之慮近觀物運遠訪師聖聲數  
後彰律理前定烏非黔黑鶴豈浴淨彼圓行而方止固  
得之於天性伊冬簞而夏裘無雙功而並盛蕩然任心

樂道安命春風夕來秋日晨映獨酌南軒擁琴孤聽篇  
章間作以歌以詠魚深沉而鳥高飛孰知美色之為正

金燈草賦

梁江淹

山華綺錯陸葉錦名金燈麗草鑄氣含英若其碧莖凌  
露玉根升霜翠葉暮媚紫榮晨光非錦罽之可學詎瓊  
瑾之能方迺御秋風之獨秀值秋露之餘芬出萬枝而  
更明冠衆藹而不羣既豔溢於時暮方照麗於霜分是  
以移馥蘭畹徒色曲池軼長洲兮杜若跨幽渚兮芳離

映霞光而爍爍懷風氣而參差故植君玉臺生君椒室  
炎萼耀天朱英亂日永緒恨於君前遺風霜之蕭瑟藉  
綺帳與羅袿信草木之願畢

書帶草賦

唐陸龜蒙

彼碧者草云書帶名先儒既沒後代還生有味非甘莫  
共三山芝校無香可媚難將九畹蘭爭叨詞林畔種在  
經苑中榮翠影臨波恐被芙蓉見鄙貞姿傍砌愁為芍  
藥相輕發葉抽英因天受性紛雅圭池上之宅拂仲蔚

門前之徑不省教施異術安得返魂未嘗輒入明庭何  
當拍佞幾臨寒日幸到青春莎蒹未傳於漁父蒲茸竊  
詠於詩人霜亦曾霑潘令偏知白薤風常遍起宋生惟  
道青蘋栽培只倚於賢鄰寧擷長憂乎稚戲出慙無用  
舒還有異當琴操發伯牙山水之情值儒編動鑿齒陽  
秋之思敢曰求友寧忘慕義吳娃楫上空羨苔滋魏主  
帷中惟通蕙氣或乃蘭榮越徼薰茂周原幽搜莫及興  
詠徒存此則對仲舉蕭疎之室處子山搖落之園不識

深宮豈是曾為帝女非侵遠道誰言能憶王孫徒愛其  
斂疎煙披曉露弱可攬結勻能布獲蕭蕭而不計榮枯  
漠漠而何干好惡金燈照灼尚驚秦帝之焚粉蝶留連  
真謂羽陵之蠹爾乃高推籬菊瑞許階棠我則惟親志  
士每聚流螢豈便離蒿萊於隙地希杜若於遙汀儻遇  
翰林主人之一顧庶長保於青青

吉祥草賦

有序

元

任士林

吉祥草酷似蘭而疎秀海國有其種率云十歲一花然



鮮有見者余過僧智傳之室見一本紫莖而花莖纔二寸綴花數十似瑞香而斂小近翫之有香氣傳且謂余曰種且十五年矣今纔一開感係之餘賦以自廣

賸靈姿之幽絕蔓天竺之化城挺纖疎之奇植負吉祥之嘉名孰化滋於下土亶見擢於衲僧方其根移露本盆壅春膏擬紫莖之逞瑞伉蘭蕙於亭皋然而朝培夕溉十有五暮春風秋露日以披滋卒深韜而重發何堅忍而舒遲諒得天之獨厚不驟悅於時宜候半世之力

深迺舒英而揚暉噫嘻江路微暖野梅漏枝駘蕩未透  
宮楊綰絲木俟夏而叢綠葉迎秋而飄飛含英之本麗  
土之支孰不聽造化之鼓舞侯氣母之推移肯耐靜於  
寒暑不跂榮於既萎噫嘻甯越之學請三十年文公之  
伯十九載而述遭彼長沙之誼乏寧志於初歲玉樓之  
賀無靜心於早慧一發泄而輒衰萬不成而敗繼余嘗  
感人事於河清之期悟城非於鶴歸之世三竊桃而人  
未知年屢變海而悵其東逝蹇美草之感余起余哀之

繆計尚深根以需榮儻來時之未艾諒就木之歎婦又  
安能訪此花之開閉

庭莎賦

有序

唐  
蕭頴士

天寶十載予以史臣推擇待詔闕下僻直多忤連歲不  
偶未選叙求參河南府軍事府尹裴公以予浮名枉顧  
遇焉而尹之外姻或綰紀綱之局怙勢矜權求府僚降  
禮於已予清慎自守不能附會爰逝我陳嫌怒遂構又  
同官多貴遊右戚酒食之會絲竹之娛無間旬朔予人

質鄙野雅不之好常願鷗鳥為儔江海是處往歲久遊  
剡中將遂終焉朝旨追召故不獲展著白鵬賦以寄斯  
意至是鬱悒彌用增想廳階之下蹊有莎草故參軍宋  
之問徙於伊川而植焉結根五紀緜冪庭際廣累萬步  
高樹十餘間以雜果陰蔽其上俗吏往來必凌踐之歎  
其稟山野之姿而託非其所以就窘迫因而賦曰

厭公門之窘束玩纖草於茲亭奚卑弱之斯極豈雨露  
之愆靈尚舍和以順時隨春夏之淒清軒房洞啓廣階

脩直槐楊蔽虧桃李對植橫層陰之冥密綴繁英之翕  
葩既高低以異姿亦濃淡而殊色胥徒牒訴雜沓乎其  
側遊塵浮煙蒙翳而不息雖蕭颯以自得亦喧卑而見  
逼宜夫坐莽浪之野帶江湖之涖託根山阿搖潁綠水  
芊緜霍靡連亘乎十數里何推遷而連會繆產時於庭  
隅憂好尚之傾奪見芟夷於難除既無心於寵辱又奚  
議於親疎承竿漑之甘潤蔽衣衿之曳婁雖為幸於斯  
日諒稟性之云殊聞哲王之布澤迨蕭葦而霑鋪苟一

類而失所猶納隍之在子矧皇穹之播氣陶庶彙於靈  
樞曷茲卉之攸託慘終年而莫舒吾將徵宰物之至理  
聿歸問於玄虛者焉

青苔賦

有序

梁江淹

余鑿山楹為室有苔焉意之所之故為是作云

嗟青苔之依依兮無色類而可方必居閒而就寂似幽  
意之深傷故其處石則松栝交陰泉雨長注絕磎俯眎  
崩壁仰顧悲凹嶮兮惟流水而馳騫遂能崎屈上生斑

駭下布異人貴其貞精道士悅其迴趣咀松屑以高想  
捧丹經而永慕若其在水則鏡帶湖沼錦匝池林春塘  
秀色陽鳥好音青郊未謝兮白日照路貫千里兮綠草  
深迺生水而搖蕩遂出波而沉淫假青條兮總翠借黃  
花兮舒金遊梁之客徒馬疲而不能去菟園之女雖蠶  
飢而不自禁至於脩臺廣廡幽閣閒楹流黃以織琴瑟  
且鳴戶牖秘兮不可見履袂動兮覺人聲迺燕階翠地  
繞壁點牆春禽鳴兮蘭莖紫秋蟲吟兮蕙實黃晝遙遙

而不暮夜永永以空長零露下兮在梧楸有美人兮敝  
以傷若迺崩隍十仞毀冢萬年當其志力雄雋才圖驕  
堅錦衣被地鞍馬耀天淇上相送江南採蓮妖童出鄭  
美女生燕而頓死豔氣於一旦埋玉玦於窮泉寂兮如  
何苔積網羅視青蘼之杳杳痛百代兮恨多故其所詣  
必感所感必哀哀以情起感以怨來魂慮斷絕精念徘徊  
者也彼木蘭與豫章既中繩而獲天及薜荔與蘼蕪  
又懷芬而見表至哉青苔之無用吾孰知其多少



青苔賦

有序

唐王勃

吾之旅遊數月矣憩乎荒澗覩青苔焉緣崖而上迺喟  
然而歎曰嗟乎苔之生於林塘也為幽客之賞苔之生  
於軒庭也為居人之怨斯擇地而處無累於物也愛憎  
從而生遂作賦曰

若夫桂洲含潤松崖祕液繞江曲之寒沙抱巖幽之古  
石汎迴塘而積翠縈修樹而凝碧契山客之寄情諧野  
人之妙適及其瑤房有寂瓊室無光菲微君子之砌蔓

延君侯之堂引浮青而泛露散輕綠而承霜起金鈿之  
舊感驚玉筍之新行若夫弱質絲幕纖滋布濩措形不  
用之境託跡無人之路望夷險而齊歸在高深而委遇  
惟愛憎之未染何悲歡之詭赴宜其背陽就陰違喧處  
靜不根不蒂無華無影恥桃李之暫芳笑蘭桂之非永  
故順時而不競每乘幽而自整

青苔賦

唐  
楊炯

粵若稽古聖皇重暉月光開博望之苑闢思賢之堂華

館三襲琬軒四下地則經省而書坊人則後車而先馬  
相彼草木兮或有足言者吁嗟青苔今可得而聞也借  
如靈山偃蹇巨壁崔嵬畫千峰而錦照圖萬壑而霞開  
王孫遊兮山之隈披薜荔兮踐莓苔悵容與兮徘徊一  
去千年兮時不復來至若圓潭寫鏡方流聚玉苔何水  
而不清水何苔而不綠漁夫遊兮漢川曲歌滄浪兮濯  
吾足挂舟橫兮蘭枻觸浦淑遭迴兮心斷續別有崇臺  
廣廈粉壁椒塗梁木蘭兮椽瑇瑁草離合兮樹珊瑚白

露下蒼苔蕪暗瑤砌澀瓊鋪有美人兮向隅應門閉兮  
踟躕心震蕩兮意不愉顏如玉兮淚如珠請循其本也  
見商羊兮鼓舞召風伯兮電赴占顧免兮離畢星雷闐  
闐兮雨冥冥皓兮蕩兮見潢汙之滿庭倏兮忽兮視苔  
蘚之青青爾其為狀也羃歷縣密浸淫布濩彬駁兮長  
廊黃緣兮古樹肅兮若遠山之松柏汎兮若平郊之煙  
霧春澹蕩兮景物華承芳卉兮藉落花歲崢嶸兮日云  
暮迫寒霜兮犯危露觸類而長其生也蕃莫不文階兮

鏤瓦碧地兮青垣別生分類西京南越則烏韭兮綠錢  
金苔兮石髮苔之為物也賤苔之為德也深夫其為讓  
也每違燥而居濕其為謙也常背陽而即陰重局祕宇  
兮不以為顯幽山窮水兮不以為沉有達人卷舒之意  
君子行藏之心惟天地之大德匪予情之所任

浮萍賦

晉夏侯湛

步長渠以遊目兮覽隨波之微草紛漂漈以澄茂兮羌  
孤生於靈沼因纖根以自滋兮乃逸蕩乎波表散圓葉

以舒形兮發翠綠以含縹蔭脩魚之華鱗兮翳蘭池之  
清潦既淡澹以順流兮又雖容以隨風有纏薄於崖側  
兮或迴滯乎湍中紛上下其靡常兮漂往來其無窮仰  
熙陽曜俯憑綠水渟不安處行無定軌流息則寧濤擾  
則動浮輕善移勢危易盪似孤臣之介立隨排擠之所  
往內一志以奉朝兮外結心以絕黨萍出水而立枯兮  
士失據而身枉覩斯草而慷慨兮固知直道之難爽

浮萍賦

唐  
常衮

居洪泉而不根植者惟浮萍而已矣不懷芳以賈害不  
街色以標美動不忤物卑以安已乘流則遊得抵則止  
如識變而知時似委命而順理故能無幽不涉無遠不  
尋隨長汀而自汎值驚浪而不沉既不遷其清濁亦何  
避乎淺深可以明逍遙之意可以警滯著之心然而推  
移河海凌歷隈澳溜緩則去遲水急則浮速秋遇楓浦  
與墜葉而齊奔春渡桃源共落花而相逐披拂丹草搖  
演青蘋出入經其潭洞高下歸其齋淪擇利而行有似

見機之士不常厥所同乎漂梗之人歌曰大江之水東  
西流別有孤萍朝夕浮莫言此中長汎汎終當結實觸  
王舟

浮萍賦

唐趙昂

汎汎者萍乘流匪寧殊源比影異沼均形初苒弱兮碣  
岸乍連延兮廣汀映池則草色同翠照日兮苔光共青  
霞凝兮片片成玉月上兮處處疑星入門自媚穠李徒  
矜其妖豔取足為樂行潦豈小於滄溟觀其枯華有時



動靜無必習坎斯止遇亨則逸安卑取順契君子之用  
心揚波隨流豈漁翁之能詰每託鄰於藻荇不混跡於  
蓬蓽與菡萏而相鮮向莓苔而如失寔幽賞之可嘉何  
寓遊之足匹夫物之云云糾纏誰分茨處牆兮或不才  
而見棄蘭生幽也終以香而自焚惟茲萍矣獨擅其美  
謙能居下知則樂水鑒孳芳於楚客寧見羞於爨簋象  
虛舟而不繫或倏往而忽來類至人之無心更出生而  
入死噫歟植匪深根長無固蒂將舍之而不艾翦豈見

用而能種藝鄙朝菌之暫榮笑匏瓜之長繫空慙雨露之恩竊愧陶鈞之惠願同蕙葭比玉而見珍託陋質於池塘之際

水藻賦

唐郭元超

遊子行邁登晉山之孤嶽翠谿晶以淪漣紅嶂赫兮崩駁爾其雲崖委溜風壑鳴泉苔彬彪以冒石藻漫莽兮山川于以采藻于彼行潦洎汙之毛汙潭之草霍霍靡靡汎汎悠悠乍黃緣於春水或羃歷於春洲觀其往往

紫散離離無畔嬾娟島嶼暎暎江漢碎流月於澄波隱  
孤雲於斷岸生不擇所長亦無叢不資潤於微露不懼  
威於勁風纖莖璀璨密葉茸茸宿銀塘之白鷺橋清水  
之文虹則知乘流則遊遇坻則植柔而能全弱而能直  
其為隱也不居高而處卑其為謙也常韜光而晦色嗟  
茂族之無託願貞芳之見移生君之銅沼汎君之瑤池  
雜青蓮與翠荇偶杜若與江離生於水人不知歲歲年  
年幽澗垂

瓦松賦有序

唐崔融

崇文館瓦松者產於屋雷之上千株萬莖開花吐葉高  
不及尺下纔如寸不載於仙經靡題於藥錄謂之為木  
也訪山客而未詳謂之為草也驗農皇而罕記豈不以  
在人無用在物無成乎俗以其形似松生必依瓦故曰  
瓦松楊炯謂余曰此中草木咸可為賦其辭曰

賓館兮沉沉明月高兮重海深試一望兮上棟下宇開  
陽闔陰彼美嘉族依於夏屋煌煌特秀狀金芝兮產雷

歷歷空懸若星榆而種天芩蓐丰茸青冥芊眠葩條郁  
毓根柢連拳間青苔而裛露陵碧瓦而含煙春風搖兮  
鬱起冬雪糝兮蒼然詎充採掇罕任雕鐫桐君莫賞梓  
匠難甄用匪適於時要必濫聞於俗傳慙魏宮之烏韭  
慙漢宮之紅蓮觀其衆開榮列虛心獨潔高寧我慕無  
木禾之五尋卑以自安類石蒲之九節進不必媚居不  
求利芳不為人生不因地其質也菲無忝於天然其陰  
也薄纔足以自庇望之常見其表尋之罔得其祕肅穆

承華堂皇不賒繩懸麥穗戶刻菱花竹簷簷而衆色樹  
連理而相加芙蓉發池兮照爛日及懸雷兮紛葩彼懷  
寶以遇賞此不材而見嗟雖有慕於階闥亦無混於泥  
沙已矣哉不學懸蘿附柏直蓬倚麻固將含美惡以同  
貫齊是非於一家亂曰少陽之地兮於何不春博望之  
苑兮莫匪正人纖根弱植兮生君之館荷施雷恩兮為  
人所翫物不謝生不知其榮惟願聖皇千萬壽但知傾  
葉向時明

瓦松賦

唐 闕名

式觀圖籍幽山窮野聞卉木之名焉考神農之嘗者根  
莖可驗洪纖不捨惟瓦松兮闕書何昔人兮智寡原其  
所託高而又雅抽形先寄於鶴樓聳質更資於鴛瓦倚  
旒芬葩含風接霞既當春而吐葉亦凌秋而點花異山  
苗之極秀狀澗松兮抽芽高居壤雷匪雜泥沙向朝陽  
兮發榮經夕露兮增華常在危簷心必直詎欲牽風影  
暫斜小大殊品高卑異盼離離兮若星榆之昭灼煜煜

兮疑石蒲之葱蒨既乏棟梁之用寧怯鐫雕之變豈比  
夫桂山上蘭谷中長幽隱兮銷馥為芬芳兮敗叢奚若  
茲物之獨茂無憂患兮養蒙

轉蓬賦

以本根一斷隨風所之為韻

唐蔣防

彼茁者蓬其生莽蕁因驚風之動地遂離根而去本委  
順而往異愚夫之守株任運則行叶高人之嘉遯摧弱  
質絕陳根始遲遲而徐轉俄忽忽而駿奔體以圓而疾  
質以弱而存凌寒後彫雖有慙於松柏近秋俱敗亦無



媿於蘭蓀時也玉露為霜金風應律歎芳菲而難久覩  
搖落之不一初宛轉以孤翻漸邈迤而連出度平野而  
暫見映層皋而還失徘徊未已同風葉之辭枝漂蕩不  
停甚水萍之委質若乃慘澹雲晚悠揚日短歲云秋矣  
莖弱者先衰風以動之根危者易斷徒觀其委地離披  
縈吹參差既忘懷於近遠寧繫跡於高卑觸物何情類  
虛舟而自汎善行無跡於野馬而相隨豈不以生無固  
蒂轉有長風象車輪未始有極如循環莫知所終遊子

感而忘歸歎飄居陌上小人見而懷土憶生在麻中矧  
夫依物暫停遇風復舉乍飄揚以厯亂或迴旋而容與  
青蘋之末不起聊可以躊躇黃埃之中自飛孰知其處  
所客有因時結念寓物屬詞觀其哀兮懼老將至矣觀  
其轉也嗟行靡不之撫懷抱起心有之誠驚鬢髮增首  
如之悲儻陽春之可待亦何恨飄飄於此時

冬草賦

梁  
蕭子暉

有閑居之蔓草獨幽隱而羅生對離披之苦節反歲蕤

而有情若夫火山滅焰湯泉沸瀉日悠揚而少色天陰  
霖而四下於時直木先摧曲蓬多墮衆芳摧而萎絕百  
卉颯以徂盡未若茲草凌霜自保挺秀色於冰塗厲貞  
心於寒道已矣哉徒撫心其何益但使萬物之後彫夫  
何獨知於松柏

愍衰草賦

梁沈約

愍衰草衰草無容色顚顚荒徑中寒荻不可識昔時兮  
春日昔日兮春風銜華兮佩實垂綠兮散紅巖陬兮海

岸冰多兮霰積布繇密於寒臯吐纖疏於危石彫芳卉  
於九衢實靈茅之三脊風急峭道難秋至客衣單既傷  
簷下菊復悲池上蘭飄落逐風盡方知歲早寒流螢暗  
明燭鴈聲斷裁續霜奪莖上紫風銷葉中綠秋鴻兮疏  
引寒鳥兮聚飛徑荒寒草合草長荒徑微園庭漸蕪沒  
霜露日沾衣

芳草賦

元  
劉詵

策予馬於曠垠兮澹旭日之暄霽爰浮游以擷芳兮渺

渺樹乎雲之際荒畹夢而眇分兮蘭猗猗兮此何地攬  
長洲之積菑兮紉峭嶼之崇蕙稅馳軼而怡悵兮芬霏  
霏兮罷轡誠樂遊以忘歸兮耿中情之所寄羌王孫之  
翠幃兮啾燕趙之絲吹陳金犧與瓊爵兮理清曲於鬢  
髻傾良辰以行樂兮一日而盡夫百卉涉朝雲與銀浦  
兮夕弄暉兮瓊田捐幽谷之寶瑛兮橫芊綿之青鈿紛  
擷掇以盈襜兮咸競秀而鬬妍忱蘭芷之不足以為芳  
兮獨有取乎康樂之髥蕭燎焚以祀帝兮艾朝進而雜

佩莽玉鉤之青合兮承朝露於輦悅蹇連昌之金鋪兮  
色泔泔而薦黛彼胡修而自致兮此獨與世而偈背同  
託根於天地兮終薰蕕之何在耿六合之流徙兮誠若  
異夫憎愛胡不變易以取好兮猶自持而焉待續紛紛  
以雜糅兮曠千古而誰采豈無人而不芳兮獨惕惕以  
自憚情依依而不昧兮雖隄側其孰悔嗟孔聖之援琴  
兮撫幽幽兮一傷惟屈子之好修兮襲之以為佩纓既  
聖賢之知心兮又何必求乎舉世之知也雖造化之若

無所別兮未必醜好之果可以欺也幸年華之未暮兮  
尚可充乎佩褱誠人間之不合兮吾將遡乎清都而薦  
之

懷芳草賦

有序

明徐世溥

芳草之稱標自楚辭本草有名者五十六種其他盖有  
不可悉者矣吳徐無減賦是詩以為一物也余友粵黎  
美周欲為賦以辨之余意微名覈實自非妙才必累文  
心因作懷芳草賦以待美周稱懷者不敢專芳草也新

涼多感聊誌恐遲暮之思云

於時秋也殘暑平退輕風捲衣人氣初斂浮雲未歸遙  
空淡洗四野低垂望難明而匪暮色可辨而偏微白兮  
漠漠碧兮萋萋有客吟秋橫笛登樓玉顏倚曲相憐復  
愁露下香濕煙交翠柔歲蕤兮伺薌澤於襟袖徘徊兮  
遇故物於汀洲似曾相識不忍經行鳥銜不盡馬蹠還  
生君如不採芳心未明若夫鄭女芍藥楚客江離倚蘭  
當佩揭車可畦蘼蕪山上白芷川湄零陵綠薦豆蔻紅



栖髟素馨兮宜頽鬢帶杜蘅兮準腰圍彼采蕭兮一日  
三秋況樹蕙兮百晦千頭種當歸兮欄畔拾留夷於道  
周莫不氣縈妝閣豔繞花韉紛迷蝶夢逞誘蜂咬雲烘  
菊勃日映芊眠憑來損檻望去穿簾釀資膏沐潤養維  
絃藏書却蠹籠葉無煙爾乃雨餘風外酒半梳成燭銷  
月暗嚙迴枕清帆投青岸鞭裊紅亭黏天同色匝地殊  
名於斯時也氣感心柔目搖魂蕩遊子悔其不返孤臣  
悲其屢放或聞一歎於牕前或步微吟於堤上雖復同

心攜手流波相媚亦惆悵以如忘乃娉婷兮更倍怨氤  
氲之掩人嗟芳菲其難沫於是占曰藉用白茅灌以鬱  
鬯伊藉茅兮見生稊於枯楊忽飲鬯兮念鬱金之可堂  
有蹁躑而拊歌者曰瓊瑜瑤璆五木香迷迭艾納及都  
梁本自折贈出遐方心有所懷路未央天涯何處無芳  
草三春何人不斷腸又沉乎木葉嫋嫋薰葭蒼蒼臨霜  
露之極浦擷寒翠而憶煖香者能不淒迷以恍惚躑躅  
而傍徨乎

春草賦

明 烏斯道

粵稽永嘉舊郡睹謝池里賡謝池吟予自鴈宕倦遊抗  
志幽尋熟翫斯景長嘯不禁客乃對予而言曰康樂有  
云池塘生春草園柳變鳴禽先生有心予志之矣於時  
春也蔚焉成林禽聲未換草色芳深奈牽行役莫遂登  
臨天涯兄弟惟子知音願賦春草以慰我心予不獲已  
賦之何陽律之柔暢乃池塘之發生始抽根以隱隱旋  
布葉而盈盈既搖風兮帶媚復向日兮含榮飛采芳之

蛺蝶集點水之蜻蜓色映袍其覺重香隨步以疑輕任  
蹢躅而無阻從攬擷而不爭應鵲聲乎淚落依馬足矣  
魂征類愁客之無緒同顰娥之有情乃若氣煦郊原沙  
蒸水岸露意漸斂煙霧初亂延綠兮紗牕流青兮綵幔  
懷人兮志往翫物兮襟散飄落花以無迹裊遊絲而不  
斷想舞燕之頻催聽啼鶯之互換則有染翰騷人尋芳  
逸史杖懸赤仄囊攜綠綺整折角之素巾躡遠遊之文  
履指柳陌以嚮導經花堤而徙倚蘚封階而迹絕龜闌

樹而聲止奈所訪之不逢復何心乎戀此嗟嗟芳草兮  
愁春芳春兮愁人草隨春而並麗愁逐草而俱新有草  
愁難歇無愁草不勻草生魂夢際愁動別離辰於是水  
漲斷橋雲沉祕閣鑪香火寢壁飄風落蝸黏筆架鳥窺  
牕格應門幾童載酒何客亮瞻雲之惆悵知倚閭之卜  
度茵展地而靜悄帶臨書而寂寞愁不絕乎池蛙怨豈  
忘乎野鶴雖追歡之在後恐對景之非昨可憐哉春日  
兮輝輝春草兮依依草生兮侵徑日落兮掩扉池塘物

色已如許為問王孫歸不歸客乃喟然而歎曰池上孤樓青陰映帶萋萋芳草遠與天界入我揮灑用酬文債草榮春盡此文不壞

幽草賦

明陳子龍

馮山麓兮望芊芊之北邙春風蕩兮緜渺而碧傷悲柔新兮紫心腸怨悄悄兮流媚芳於是紫玉山池韓憑臺墓相思溪水合歡塋樹棠梨豔風蕙蘭啼露學纖潤於脩眉鬬輕揚於翠羽枝分埋玉之光根展殉香之路潑

水碧以逝愁染雲藍而煎嫵想其細雨初戢落月半明  
狐拜星隱鬼泣燈橫緝衣花而珮冷飛裙蝶而神輕莫  
不斷魂沉葉集感遙英至若漳水荒臺驪山廢殿浥溫  
泉以豐滋膏紅粉而惹舊歌雄姿兮青蕪閉玉顏兮綠  
冑沒文砌而藏蜂觸綺牕而巢燕撥玄叢之化衣拾翠  
圍之遺鈿傷故國兮荒莽深追歌舞兮空睇眄又若小  
院春閉鶯閨暗思感秀條之間靜攬連心之依垂落流  
蘇而縈帶墮小鬟而膩枝暗藉長門佳人難拾濃鋪輦

道宮車未期鸚鵡空啄蝴蝶頻移注清眸之別婦留飄  
裙之怨姬至如巫兩通巴湘煙壓楚蘿密披人莎深竄  
鼠望蒙鬱於羈臣沉幽陰於恨侶洗清潭之紫莖蔽竒  
香而不處火煜煜以焚如巫傲傲而祀女點碧血兮江  
皋亂涼魂兮幽渚更有柳郊新織蘭澤初蕤茁嫩煖而  
迎日枝柔和而漾絲嚼鴛鴦於沙芷拂翡翠於香蘿妖  
童蕩槩遊女下騎競習芙蓉之句相傳兮樂之詩河水  
濫濫岸草離離灞涯贈別江漢相思感此淒惻令人忘



遺何我情之誕愁遇小物而斯滯生死齊憂悲歡同贅  
惟茲草之榮苑任往來於年歲胡觸緒而紛紜盡虛無  
之妍慧是以放志天適解情冥契啜華三山之間採芝  
五嶽之際值荆園而未芟經瑤田而不憩庶幾忘情之  
士滌我傷心之蔽者乎

盆草賦

明  
傅占衡

天生於下澤之阿兮承閒娛而厯茲獲免中庭之歌烈  
兮拂座右之清颼余翦其萎黃之敗族兮爰盆舟而濯

之當秋陰而媚賞兮忽挺翠以自持延白雲於旭檻兮  
隱明燈於夕帳纖青青其脩立兮宛平楚之在望時憩  
目而留睇靜疲民而不蕩苟徑寸之孤芳亦何羨夫尋  
丈及秋蘭之未佩懷山桂而方遙引王孫以綴席挾中  
丞以為寮咏西澗之微吟想離離之下苗雖暫歡於盆  
石亦傷別乎遠條譬飲啄之樊雄徒神王而未驕曾不  
得反於雨露之上兮吾將灌以墨池之水飲固潔而不  
貪兮色謝盈而不毀遠脂藥於閨人兮託馨香於君子

物有處賤而必登兮又奚為乎玉階之視乃為歌曰草  
短短兮來他山異衆華兮松顏或下簾兮閉關彼幽人  
兮可與之言

莽草賦

有序

明  
靳學顏


予道商顏谷中見莽草摘葉桂莖丹萼素蕾意若自負  
不儔凡卉者厥形麗矣然一葉入吻百內潰裂是何形  
情之詭與予始撫而狎之繼知其然委諸絕壑彌數而  
去旋復自咎夫已既已知矣而不以詔人不仁是草有

負於造物甚厚不厚誅之不義迺追製此賦示之來喆  
毋若予之始狎之也

豔山兮神丘麗水兮炎洲祥芝兮九葩赤葉兮瑤流既  
採服以返精兮亦練餌而千秋胡茲植之獨戾秉駁氣  
之弗協生百需而無益獨戕物而呈捷紺藹敷芬蒼條  
輪囷素芭冒朱縹茸施殷乍斂乍開含嘻含嘖葉不辨  
橘莖不分桂葉英周柯益津豐媚曰旋樞之流精與皋  
塗之麗卉孰凝爾質俾疑厥類熙榮外揭酷氛內藏危

鋒誤觸颺迅機張彼太行之陰產紀矣經而已習未若  
茲之可翫貽永感於一吸弄影濫汎之汴托跡蘋藻之  
濱殖中遠而揚意挺脩垌而驕神瘖馬飲波倦旅息蔭  
將淫毒之有加曾自知其已甚后皇申嘉錫淑慝均化  
光覆露渥涵湛陰陽宣昭明受命誠不遷美利咸各正  
厲渾何偏滯範茲不肖形矜已若不足害物為有羸是  
以作賦敬陳明則比物聯類具懲賊德其辭曰秀色可  
餐言若醴飭貌深衷詎測底觀莽草兮類若子覆人邦

家利舌齒白者膚革黝者理觀莽草兮類若子金石示  
剛胎韋裏覆却色沮觀者鄙觀莽草兮類若子疏節闊  
視澹無滓嫉刻填膚唯有已面而頌兮背而訾觀莽草  
兮類若子



御定歷代賦彙卷一百二十

欽定四庫全書

集部

御定歷代賦彙卷百二十一

詳校官檢討<sub>臣</sub>劉 炘

主事銜<sub>臣</sub>徐以坤覆勘

總校官編修<sub>臣</sub>王燕緒

校對官編修<sub>臣</sub>潘曾起

謄錄監生<sub>臣</sub>張 濤



欽定四庫全書

御定歷代賦彙卷一百二十一

花果

朝華賦

晉  
夏侯湛

咨神樹之修異實積陽之純精蛻潛根以誕節據川壤  
以擢莖皎日升而朝華玄景逝而夕零逮明晨而繁沸  
若靜夜之衆星長莖攢起柔條列布濯靈柯於時雨滋  
逸采於豐露灼煌煌以煒煒獨崇朝而達暮於是茂樹

蒼蒼纖枝翩翩潛光玉朗綠葉翠鮮

春花賦

晉王

氏

劉柔妻

千葩粲其昭晰兮百卉蒨而同榮  
蘭圃翹以含芳兮芝薄振而沈馨  
翠穎競臻衆條頻英或異色同形  
或齊芳殊制自然神香不可勝計  
爛若羅宿之垂光灼若隨珠之宵  
列爽若翡翠之羣翔練若珊瑚之  
映月詩人詠以託諷良喻美而光  
德準工女於妙規飾王后之首則

牡丹賦

有序

唐

舒元興

古人言花者牡丹未嘗與焉蓋遁於深山自幽而芳不為貴者所知花則何遇焉天后之鄉西河也有衆香精舍下有牡丹其花特異天后歎上苑之有闕因命移植焉由北京國牡丹日月寢盛今則自禁闥洎官署外廷士庶之家瀰漫如四瀆之流不知其止息之地每暮春之月遨遊之士如狂焉亦上國繁華之一事也近代文士為歌詩以詠其形容未有能賦之者余獨賦之以極其美或曰子常以丈夫功業自許今則肆情於一花無

乃猶有兒女之心乎余應之曰吾子獨不見張荊州之  
為人乎斯人信丈夫也然吾觀其文集之首有荔枝賦  
焉荔枝信美矣然亦不出一果耳與牡丹何異哉但問  
其所賦之旨何如吾賦牡丹何傷或者不能對而退余  
遂賦以示之

圓玄瑞精有星而景有雲而卿其光下垂遇物流形草  
木得之發為紅英英之甚紅鍾乎牡丹拔類邁倫國香  
欺蘭我研物情次第而觀暮春氣極綠苞如珠清露宵

偃韶光曉驅動盪支節如解凝結百脈融暢氣不可遏  
兀然盛怒如將憤洩淑色披開照曜酷烈美膚膩體萬  
狀皆絕赤者如日白者如月淡者如赭殷者如血向者  
如迎背者如訣拆者如語舍者如咽俯者如愁仰者如  
悅裏者如舞側者如跌亞者如醉曲者如折密者如織  
疎者如缺鮮者如濯慘者如別初朧朧而上下次鮮鮮  
而重疊錦衾相覆繡帳連接晴籠畫簾宵露裏或的  
的騰秀或亭亭露竒或颯然如招或儼然如思或帶風

如吟或泣露如悲或垂然如絕或爛然如披或迎日擁  
砌或照影臨池或山雞已馴或威鳳將飛其態萬萬胡  
可立辨不窺天府孰得而見乍疑孫武來此教戰其戰  
謂何搖搖纖柯玉攔滿風流霞成波厯階重臺萬朵千  
窠西子南威洛神湘娥或倚或扶朱顏已酡角銜紅釭  
爭顰翠蛾灼灼妖妖逶迤迤迤漢宮三千豔列星河我  
見其少孰云其多弄彩呈妍壓景駢肩席發銀燭爐昇  
絳煙洞府真人會於羣仙晶熒往來金釭列錢凝睇相

看曾不語言未及行雨先驚早蓮公室侯家列之如麻  
咳唾萬金買此繁華遑恤終日以言相誇列幄庭中步  
障開霞曲廡重梁松篁相加如貯深閨似隔牕紗髣髴  
息嬌依稀館娃我來覲之如乘仙搓脈脈不語遲遲日  
斜九衢遊人駿馬香車有酒如澠萬坐笙歌一醉是競  
孰知其他我紫花品此花第一脫落羣類獨當春日其  
大盈尺其香滿室葉如翠羽擁抱擲比蕊如金屑妝飾  
淑質玫瑰羞死芍藥自失天桃斂迹穠李慚出躑躅宵

潰木蘭潛逸朱槿灰心紫薇屈膝皆讓其先敢懷憤嫉  
煥乎美乎后土之產物也使其花之如此而偉乎何前  
代寂寞而不聞今則喧然而大來曷草木之命亦有時  
而塞亦有時而開吾欲問汝曷為而生哉汝且不言徒  
留翫以徘徊

牡丹賦

明  
徐渭

何名花之盛美稱洛陽為無雙東青州而南越曾不足  
以頡頏茲上代之無聞始絕盛乎皇唐爾其月坡隄上



長壽街東張家園裏汾陽宅中當春光之既和藹亭榭  
之載營天宇曠霽兮絲游景物招人而事起彼貴子兮  
王孫戲游龍於流水遶茲葩而密坐藉芳草而靡靡感  
盛年之若斯傷代謝之能幾爾則粉承日華朱含霧雨  
羣蒂如翔交柯如拒凌晨併妝對客不語衛尉出婢子  
於羅幃鄂君擁翠被於江渚當其百蕊千芽照耀朱霞  
綠葉紛紜望之轉賒若儒生之授學列女樂於絳紗迨  
夫背戶迎牕上下葦簷二三作隊矯矯愈鮮飛燕進女

弟於遠條夫人挾三國而朝天錦辦重捲擅心飛屑柔  
鬢夜殷怒芭曉決宛婦姑之反屑似相稽而無說則有  
若盛時合眷諸娣從韓姑以同歸颿焉彫哀漢王放宮  
人而憎別風薦小爽雨委微溫楚姝舞歇於章臺陳后  
泣罷於長門亦有細加巨上慎妃橫逼座之勢紫侍黃  
側班姬抗同輦之尊或勁而昂婕妤當逸熊於上殿或  
翹而望處子窺宋玉於東垣既離以披亦競而駢近不  
極態遠不盡妍大髣髴乎佳麗意所想而隨存奚援引

之數株可罄比而殫論

季秋牡丹賦

有序

宋  
蔡襄

爽秋涉杪扶欄間有牡丹舊拚輒吐芳楨亭亭上擢發  
紅葩一大可徑咫尺角春取勝無間然爾扶欄當彩翠亭  
之右亭屹縣圃之西北隅圃直縣堂之背縣介大江之  
南蓋漢元朔中江都易王上封其子敢為丹陽侯邑於  
蕪湖此其地歟今為太平州筦時河間凌公尹之行再  
暮矣政休賦集又所瀕江英游雅故受署齋代被召將

命者憧憧然率道其疆故觴詠之娛相因無缺及此珍  
卉馨茂公有異時之貴趣張具高會於其側所謂彩翠  
亭者酒三行濟陽蔡某醵舉而言曰公走文章聲二紀  
於茲顛葆幾華位不過禁省二丞官不過萬戶長吏而  
善禦外物居頗休閒獨以浩博記書稱道聖明為事今  
是花也韜英和緒揭麗蕭辰時雖後而且大盛意者公  
其日宴亨會才慮將有所售乎昔騷人取香草美人以  
婉忠潔之士牡丹者抑其類歟請為公賦之其辭曰

翔羽南翔建杓西宅霜天一清露草皆白悲哉轉涼葉  
於亭皋兮悵穠華之闐寂均百草之不能秋兮何此花  
天姿之的的使人觀之若披大暑兮臨清湘剝層靈兮  
仰白日厥初槁壤潛春扶欄向夕芳技舉以融怡絳蕊  
局兮羃歷寶霧宵籠鮮風曉拆麗或中人香可專國刻  
紅炬以烘燄綴彤霞而薦色鬱第誰語丰茸自持非倚  
瑟之神女抑善賦之文姬俯清都而時下簸晴陽以孤  
嬉霄灝瀚兮排金扉氣硠礪兮張寶帷電煜煜兮揭朱

旗雲腫臃兮披縑衣難綠跗兮曠修眉姹鮮萼兮伸微  
辭沛怡愉兮新相知眇悽惻兮送將歸挑有援兮溪之  
曲蓮為媒兮澤之湄羌此物之善遠亶夫君之後時君  
不聞佳麗皇州喧繁戚里清籟迢迢名園疊疊綺攏曉  
兮金鐻聲繡牆明兮雨苔紫嚴霰才歸光風半起於是  
萬蒂駢紅交柯結翠密顏紆餘斜袂輕倚文鴛羣飛鶴  
錦橫被綵蓋攀聯緹裳積委則有姝姝玉人翩翩卿子  
寶韉過兮飛電珠懷來兮流水擁翫嘉辰笑語成市彼

瓊蕤美英縹葉新  
藹羞不得借其餘  
光矧標揚乎意氣  
今何為兮江之干  
地之卑兮歲將闌  
荆蕪比兮霜月寒  
望下苑兮思上蘭  
嘉本擢兮靈根盤  
泊淮波兮鮮楚山  
是知元冶一陶昌  
生萬育無左右先  
容者淪乎朽株當  
匠石不顧者被之  
散木譬此花之賦  
命兮亦節暮而葩  
獨然貴賤反衍禍  
福倚伏其暮也何  
遽不為貴其獨也  
庸知不為福噫化  
工物情吾以此卜

山蘭賦

陳  
周洪讓

爰有奇特之草產於空崖之地仰鳥路而裁通脉行蹤  
而莫至挺自然之高介豈衆情之服媚寧紉結之可求  
垂延佇之能泊稟造化之均育與卉木而齊致入坦道  
而銷聲屏山幽而靜異獨見識於琴臺竊逢知於綺季

幽蘭賦

唐  
楊炯

惟幽蘭之芳草稟天地之純精抱青紫之奇色挺龍虎  
之嘉名不起林而獨秀必固本而叢生爾乃丰茸十步  
緜連九畹莖受露而將低香從風而自遠當此之時叢



蘭正滋美庭幃之孝子循南陔而采之楚襄王蘭臺之  
宮零落無叢漢武帝猗蘭之殿荒涼幾變聞昔日之芳  
菲恨今人之不見至若桃花水上佩蘭若而續魂竹箭  
山陰坐蘭亭而開宴江南則蘭澤為洲東海則蘭陵為  
縣隰有蘭兮蘭有枝贈遠別兮交新知氣如蘭兮長不  
改心若蘭兮終不移及夫東山月出西軒日晚受燕女  
於春幃降陳王於秋坂乃有送客金谷林塘坐曛鶴琴  
未罷龍劒將分蘭缸燭耀蘭麝氛氲舞袖迴雪歌聲遏

雲度清夜之未艾酌蘭英以奉君若夫靈均放逐離羣  
散侶亂鄢郢之南都下瀟湘之北渚步遲遲而適越心  
鬱鬱而懷楚徒眷戀於君王斂精神於帝女汀洲兮極  
目芳菲兮艱予思公子兮不言結芳蘭兮延佇借如君  
章有德通神感靈懸車舊館請老山庭白露下而警鶴  
秋風高而糾縈循階除而下望見秋蘭之青青重曰若  
有人兮山之阿紉秋蘭兮歲月多思握之兮猶未得空  
佩之兮欲如何抽琴命操為幽蘭之歌歌曰幽蘭生矣

于彼朝陽含雨露之津潤吸日月之休光美人愁思兮  
採芙蓉於南浦公子忘憂兮樹萱草於北堂雖處幽林  
與窮谷不以無人而不芳趙元淑聞而歎曰昔聞蘭葉  
據龍圖復道蘭林引鳳雛鴻歸燕去紫莖歇露往霜來  
綠葉枯悲秋風之一敗與蒿草而為芻

幽蘭賦

以遠芳襲人終古無絕為韻

唐喬彞

蘭之生矣不以無人而不芳被廣澤森回塘和寡調高  
未儷郢中之曲神符夢叶終傳鄭國之香贈靈修於南

浦襲嘉慶於北堂於是半眠茂苑靡迤秋坂綬而為佩  
騷人之意已深間以在衿楚客之情何遠薄秋風而香  
盈十步汎皓露則花飛九畹豈衆草之敢陵幸移根之  
未晚若乃吳山清兮天氣新湘水碧兮楓岸春煙轉綠  
蕙波搖白蘋榮曲沼之初蓮遺天涯之美人離別經時  
歎孤芳於秀質豔陽可惜悵獨立於良辰復有映金砌  
羅玉戶分竹宮疏蕙圃因風而起不隨彼茁之蓬擇地  
以生能殊有扶之杜宜其比同心於先哲冠美名於前

古蘭之在幽兮其芳滿叢士守業兮其道未通入提携  
固在於高賞播酷烈當跼於下風寧使彫急景於散地  
迫嚴凝於歲終况復光陰慘烈冰霰淒切靜而處順不  
得近於階墀長未當門獨遣冒於霜雪豔歇紅暗莖萎  
紫折懼鸚鵡之先鳴掩氛氲而頓絕於戲蘭與艾兮異  
味薰與蕝兮殊途一室之人雖當執我之契十年之臭  
尚可攘公之翰囂然此道何有何無嗟乎蘭無薰兮寥  
擷之所不及士無文兮聲華之所不立儻一借於韶光

庶餘香之可襲

幽蘭賦

以遠芳襲人終古無絕為韻

唐陳有章

翹翹嘉卉獨成國香在深林以挺秀向無人而見芳幽  
之可居達萌芽於陰壑時不可失吐芬香於春陽所以  
紫翹十步名傳九畹自下并高結根聳幹布葉逾密重  
陰未晚開緗蕊而乍含擢丹穎而何遠好遵正直生匪  
臨於斜徑不向嶮巖質寧被於長坂獨茂幽壑厭若錯  
薪幾霑雨露猶苦風塵采掇兮有日芳菲兮度春得臨

刈楚之地曷異修詞之人燕妃夢中榮何名而不遂蜀  
琴曲裏奏何聲而不新況衆英聚集傳香氣而相巖佳  
色葱蘢帶煙翠而攢叢固已歎夫貞潔期見賞於始終  
幽處斯久照臨忽通喜會無私之日深繫有力之風幽  
莫過於芳蘭誠匪同諸草莽充佩而靈均不棄入握而  
仙都必取詎比夫山上蘼蕪泥中蘅杜將虛名以共播  
竟無善而足數焉知夫光善才於左思能成賦於師古  
而已哉知我者謂我如碩儒不知我者謂我如生芻此

幽人之未已亦何代而云無幸逢昭代得遇良哲雖偕  
薰猶固有分別勿以卉賤不顧幽芬勿心地寒不軫孤  
絕儻折英而入用庶有光於優劣者也

幽蘭賦

以遠芳襲人終  
古無絕為韻

唐韓伯庸

陽和布氣兮動植齊光惟彼幽蘭兮偏含國香吐秀喬  
林之下盤根衆草之旁雖無人而見賞且得地而含芳  
於是嫩葉旁開浮香外艱既生成而有分何掇採之莫  
及入握稱美未遭時主之恩納佩為華空戴騷人之什



光陰向晚歲月將終芬芳十步之內繁華九畹之中亂  
羣峰兮上下雜百卉兮橫叢況荏苒於光陰將衰敗於  
秋風豈不處地稍幽受氣仍別蕭艾之新苗漸長桃李  
之舊蹊將絕空牽戲蝶拂花蕊之翩翾未遇來人尋芳  
春而採折既生幽徑且任榮枯冪輕煙而惹翠帶淑氣  
而紛敷薰雨露之溥及何見知之久無及夫日往月來  
時占歲覩遇達人之回盼披荒榛而見取橫琴寫操夫  
子傳之而至今入夢為徵燕姑聞之於前古生雖失處

用乃有因枝條嫩而既麗光色發而猶新雖見辭於下  
土幸因遇於仁人則知夫生理未衰採掇何晚幽名得  
而不朽佳氣流而自遠既徵之而見寄願移根於上苑

幽蘭賦

以遠芳襲人終  
古無絕為韻

唐

仲子陵

蘭惟國香生彼幽荒貞正內積芬華外揚和氣所資不  
擇地而長精英自得不因人而芳況乃崖斷坂折蹊分  
石裂山有木而轉深逕無人而自絕柔條獨秀芳心潛  
結翡翠戲而相鮮靡蕪生而共悅然後衆草之中迴為

一叢卑以自牧和而不同揚翹布葉舒翠錯紅宵承結  
露曉汎光風傾於陽希所照無隱託其地知其道有終  
且求之昔人徵以遠古宛成章於楚客爰命操於尼父  
佩之衆匪蘭不紉曲之多匪蘭奚鼓夫以薰蕕之喻臭  
味斯殊同之則十年猶有異之則一日而無乃清以為  
露滋而為畹比德者以之守貞贈離者以之傷遠宜其  
出幽谷之濱為階除之珍羅堂未晚被遲知春依瑤池  
而自庇與玉樹之為鄰杜若芳芷香辛白蘋俱受生於

大塊獨取象於同人是故蘭也之采伊人所急篇章間  
起比興俱入道之廢可鉏而去道之興可俯而拾為君  
灑微芳於素衿希見寶於重襲

幽蘭賦

以遠芳襲人終  
古無絕為韻

唐  
李公進

幽有寂兮蘭有香香者取其服媚寂者契其韜光是以  
綠葉紫莖偶貞士而必佩深林絕壑挺奇質而獨芳觀  
其異彩特秀結根自遠靡生於門寧滋於畹朝陽照而  
雜花不得間其榮光風轉兮衆草無以齊其偃杳杳深

處芬芬絕倫保貞操以擅美發英華以藻春葉凝露以  
珠綴花含煙而色新移於友也則斷金之利樹之庭也  
則如玉之珍豈比夫協夢呈祥表嘉名於鄭國循陔見  
采流雅詠於詩人而已哉蘭之幽兮芳可折幽無人兮  
芳不絕蘭之生兮美自豐生得地兮美無終故雖敗於  
涼飈諒有嘉於前古方比契於松筠詎齊名於蘅杜且  
夫麗白雪之綺靡被長坂之芬敷激餘芳以孤映極幽  
致而自殊則在握者何居擇者何無蘭處幽而轉芳芳

無遠而不襲賢尚晦而必著著何道而不入伊哲人之  
素履盍徵蘭以自執苟馨香之發聞越江山而採拾

幽蘭賦

有序

宋李綱

蘭有二種華以春者似蕙華以秋者似菊楚辭曰秋蘭  
兮青青綠葉兮紫莖又曰春蘭兮秋菊長無絕兮終古  
今世人之所識者素葩叢本特春蘭耳余嘗得一種蘭  
於亡友蕭子寬家綠葉紫莖其香似春蘭而加芳食之  
味尤辛甘可以調羹曹子建七啓於肴饌之妙言紫蘭

丹椒施和必節滋味既殊遺芳射越乃知茲蘭可食其  
為秋蘭無疑也二蘭皆喜生於高山深林闐寂無人之  
境則芬芳郁烈茂盛而遠聞移而置於軒庭房室之間  
不過一再歲花益鮮而香益微蓋其天性如此故古人  
又以幽蘭目之與夫山林隱遯之士耿介高潔不求聞  
達於人而風流自著者亦何以異故感而賦之

相百卉之芳菲兮待培植而乃成何茲蘭之異稟兮處  
幽僻而方興高山崔嵬而龍從兮深林杳杳以冥冥下

波濤之噴激兮上雪霰之飄零邈人跡之不到兮蘭於  
焉而獨馨言茁其芽載擢其英春與蕙兮偕秀秋與菊  
兮並榮或素葩而叢本或綠葉而紫莖雖春秋之異種  
豈殊德於幽貞耿介自許芬芳誰與久而不知其香晦  
而不改其度榮何謝於光風瘁何傷於白露配芝桂以  
為友奚蕭艾之能侶類同心之契合比明德之欣附淑  
人君子愛而不忘蒸以為藉沐以為湯紉之為佩刈之  
為防實有取於雅操匪徒慕夫國香若夫出自故山同



夫小草資耳目之嘉玩供園林之幽討雖得托於孤根  
蓋已違其所好譬猶高潔之士隱遯之人蹈山林而長  
往友麋鹿而同羣付功名於脫屣等富貴於浮雲室雖  
邇而人則遠可得聞而不可見有泉石之枕漱無猿鶴  
之驚怨晦其跡而彌芳懷其道而愈顯子真谷口德公  
鹿門二子食薇於首陽四皓採芝於商山名與實兮兼  
茂心與跡兮俱閑播清芬於今古亦何以異於幽蘭

幽蘭賦 有序

宋 高似孫

蘭曾伴屈大夫政復何恨然非屈大夫無知蘭者余固  
非知蘭亦非知大夫者後五百年或有知余者焉

皇以度而揆余兮宛貞貞而孔安含素光以致蠲兮考  
幽人之所槃澹羣動而不競兮約洵美而且閑嫺孤風  
之脩脩兮幾激貪而律頑一既分而為乾兮老羣星之  
芒寒又一索而坤動兮百嘉熾而多蕃余乃持其神秀  
兮成天地之所難陵高姿以吐妙兮抱幽古而遐觀峭  
夷齊之特立兮非盜蹠之可奸懿西子之孤靚兮豈嫫

母之並歡彼釜礫之自珍兮有瓚璫之獨刊又蒿猶之  
盛蔚兮幸蘅若之未殘兮明水以薦芳兮三沐浴乎清  
瀾耿積雪其如素兮尚有知余寸丹眇洞庭之始波兮  
木舞葉其珊珊凍沅湘而欲合兮騁白蘋而渺漫招帝  
子而不來兮棄余璫於江干導微馨以輸誠兮律九歌  
其銷魂

秋蘭賦

有序

宋 高似孫

客有遺余秋蘭者比家山所毓尤清瘠特香味稍減豈

涼未深邪系之以辭

眇銀渚之如傾兮訊宵涼之方幼  
俶有風之西香兮疎孤貞之俄秀  
宛青葉而紫莖兮花四三叢且瘦  
心兩兩而一知兮驚汝我之俱舊  
吁靈均之有靈兮炯不死而猶壽  
九其歌之迢迢兮豈韶勺之可奏  
洞庭波而舞葉兮菊英英而趨茂  
何獨憐此幽深兮了非聞而非嗅  
杳渚北之雲興兮帝子澹乎先後  
擷微芳而薦嘉兮叫湘皋而寒溜  
余既莫之偶兮律遺聲而孰扣  
勺明水以酬

君兮耿斯意之不可又君亦裴回而忘歸兮指蘅茝而  
將授余更曰芳之克肖兮豈氛凡之能垢不能易其何  
言兮今琅琅乎其臭

伊蘭賦

有序

明楊慎

江陽有花名賽蘭香不足於豔而有餘於香戴之髮紒  
經旬猶馨意古者紉佩之用頻浴之具必此物也西域  
有伊蘭以為佛供即此漢書所謂伊蒲之供也從而為  
之賦曰

英英有蘭猗猗其美諡以伊蘭實自邛始維蘭之品粵  
繁有叢曰蕙曰蓀錯選丰茸曰芷曰菝名殊物同形如  
蒲萱益盍是薦謠俗攸珍乃蘭之屬可佩可紉服之媚  
人昔號國香今茲曷湮宜湯宜浴陳除新沃昔聞其語  
今茲則愬先正誓蘭謂識之艱山谷致疑晦翁屢歎懿  
若卉之挺生兮何理美而琦絕既歲誕以晞暘兮亦辰  
岑而帶岳友射干而偕生兮朋荔挺而俱發漱玄英之  
朝澤兮應復至之陽月秉荼蘼之專榮兮擅芳菲之酷

烈開以景風之淑辰兮貫乎星回之火節漱沆瀣之芳  
潤兮全朱明之炎德匪直十步之有芳兮曾驗經旬之  
未歇乃有娥媯掩嫫媧靡曼嫵昭步步移豔笑笑傾城子  
夫興於鬢髮昭儀寵於體馨曳步搖之馥郁映角犀之  
豐盈若蘭機迴文之錦李蘭琴綠綺之聲爰色授而魂  
與且目眩而心縈倭隨梁家之髻浮渲韋孃之纓咸纖  
拍兮爭拔並巧粲兮相迎都梁蟾蜍兮閼爾而減價虎  
蒲龍棗兮瞠乎其亡菁超旃檀於雪域壓迷迭於雲清

星芒當晝而弗隱金粟未秋而先成埒瑤華兮玉蕊叶  
綠葉兮紫莖堪納涼於玄圃思御風兮蓬瀛詎數秋紅  
之蔭子豈顧晚翠之長卿爰感子兮體物遂錫子以嘉  
名重為系曰肇允嘉卉兮昉自炎皇娥人之佩兮王者  
之香深谷逶迤兮無人自芳宣尼息騶兮屈平纍湘晨  
月秋風兮屬國之堂洪波霜晚兮謫仙之鄉紉遺佩捐  
兮庸亦何傷體物瀏亮兮聊以相羊

藏芝賦

有序

宋  
王令



丙申歲自四月至六月大雨而余之所客天長縣東北  
皆瀕湖澤地浸以下頗以水為患傷草木多死邑居無  
薪芻而益貴薪益來自遠以余之所居則薪之自北來  
者常售於余間而有得若枯華斷穎根梗蒂芥支離擁  
腫與碩實所異於常草者皆取以戲就其中嘗試視之  
余得則芰也折傷不完計之於全此當一葉耳不知其  
他安在也其生雖不知遠近要皆在縣之北以常負薪  
之所來則芰從可知也示人則不齊有由是而知有芰

有由是而信為芝有雖得是而弗之信者然芝之為物  
不常有而或出可愛者也自古詩之作見於今者凡三  
百篇其以風賦比興而附見於物若蘋蘩薺蕨芣苢苦  
藿萸唐菖遂瓠匏瓜葛鬱蓼葵藿葍芹藻莫茅荼蘭苓  
蓬莠草蒿萑蒲萑葦葭蕭艾稂莠蒼耳禾麻菽麥黍  
稷豆菽秬秠糜粟稻粱菅苧卷耳芣苢菁莪莠蔓荷華  
游龍茹蘆芎藭之類雜見並出然此特草耳其多蓋如  
此而未嘗及芝也自詩而下長辭章而善自托者獨有

屈原今其離騷九歌具存而可考然其況意所及自詩人所紀之外復益以江離芙蓉杜若薜荔木蘭白蘋菖蒲葜葜車蕙芷茝菊艾蘼薺葳蕤蕪葍蓀而地所常產目所同識之草盡矣若夫陳忠而直私忿廢而怨遂託於彼而取此以見義此則余之所知至於道則余不得而一也然稱類已衆而芝復獨遺是誠何故邪說者遂以九歌之三秀為芝余以其不明又其辭曰適山而採之則芝非獨山草蓋未足據信也及觀漢樂歌蓋當時文

工輒人緣飾世治以裁主意耳非有如詩人騷客鬱於中而不得言憑於物而後見者皆非余所好也今余得芝而賦之意皆在於賦序故不道也

庭勾突萌抽蔚擢秀孰非春兮垆培壅埋播溉輒時孰非人兮不為常生時見挺出芝則神兮靈幹不阿衆葉類附不孤有鄰兮生莫時期毓無種裔天生德兮茅苴薦庭藤蕪薦道退野即兮生無本根拔不滯如無吝惜兮榮而不華槁而不枯莫損益兮莖葉翳陰高出下蔽

適以取容兮朝菌射干齊長並秀德不校同兮荒原穢  
壤棄放委廢若將終兮知者謂誰何為來者似不必逢  
兮困於不知東於薪蘇自信不恥兮摧戕折傷披本斷  
幹禍不自己兮火炎木焚投置不縮知命有止兮偶於  
自生不祈見聞吾與爾已兮

水仙花前賦

有序

宋 高似孫

水仙花非花也幽楚窈眇脫去埃滓全如近湘君湘夫  
人離騷大夫與宋玉諸人世無能道花之清明者輒見

乎辭

天以一而生神坎以習而成玄渫沖奧以致潤抱孤貞  
以成妍禹何智以能海羲何神而開乾際壑烝之無畔  
壯英心之自仙悲莫悲乎巫咸之鄉哀莫哀乎原胥之  
淵迅英挺以如濯肯徘徊而自憐至若鮫館截綃而凝  
霜貝庭含璣而媚川蒼茫乎三島之接霧杳眇乎十洲  
之匯天雲雨閑霽水空澄鮮一色如磨萬波不顛亦有  
帝女兮泣竹湘君兮鼓絃神妃兮解佩冰夷兮扣舷是

皆凝姿約素挺粹含媚以婉自將以淑相宣芳以氣屬  
妙以辭傳指北渚以將下薄西津而驟旋或零芳若或  
采佳荃有蘭可餐有蘋可搴於是樂極忘歸塵空失蠲  
萬慮俱泯餘情獨荃扣冰娥以勺斟訪瑤母而潔嫺挹  
水星以請命託神祇而垂甄已矣乎超萬劫以自蛻麗  
一微而獨涓懷琬琰以成潔抱雪霜以為堅參至道以  
不死秉至精而長年是蓋苞水德之靈長合五行之自  
然者乎

水仙花後賦

有序

宋高似孫

余既作前水仙賦疑不足以渫余之情者乃依稀洛神賦為後辭尚庶幾乎

余從太史游覽山川汎瀟汨下澧沅摩嶷雲息梧煙歲莫天寒僕痛車顛爾乃釋鑣乎菑涯進秣乎芝廬周旋乎荆澣騁望乎湘淵於是神疑目駭心離意惻即之懽恍適焉髣髴覩一美人於水之側乃拊從者而訊之曰汝有識於彼者乎彼何人者甚閑且潔也從者進曰僕



聞茲水之靈曰湘夫人然則太史公之所遇其或是乎  
其形維何僕願知之余告之曰其狀也皓如鷗輕朗如  
鵲停瑩浸玉潔秀含蘭馨清明兮如閨風之翦雪皎淨  
兮如瑤池之宿月其始來也炯然層冰出蛟壑其徐進  
也粲然清霜宿瓊枝沈詳弗矜燕婉中度不穠不纖非  
怨非訴美色含光輕姿約素瓌容雅態芳澤不汙素質  
窈窕流暉嫋嫋抱德貞亮吐心芳蠲婉孌幽靜志泰神  
閑柔於修辭既丰且鮮飭躬被服稽圖合章峨五采之

英珥兮錯九芝之明璫舞碧霓之修帶兮妥英雲之輕  
裝顏有鍊而如灼體非薰而彌香沐姱容之練練乘清  
氣之徜徉於是舒懷肆逸且娛且蟬羽蓋翳映翠旄繽  
紛輝金搖之欲墮兮玩晴洲之青蘋余衷耽其靜變兮  
黯澹蕩而馳神媒不靈於締歡兮託湘波以通勤暢中  
靈之骨悟兮捐余璫於水濱懿玉儀之靜莊允約矩而  
應規輕瑤華而不御兮指二南而揚詩謂皎日之可鑒  
兮非暗室之自欺數解佩之夙遇兮風嫋嫋而凝思志

貞介而言妙兮誓守禮以將之於是靈修竦然孌婉徘徊拊孤影以欲翦心將飛而仍回褰孫憐之芳烈燕芷房之玫瑰感幽志之悽激兮喟揚音而彌哀爾乃衆真縹緲並游嘯侶或濟西滙或臨北渚或采幽蘅或茹芳杜約洛川之神妃會巫陰之奇女清莫清乎姮栖愁莫愁乎牛渚娟輕裾之裔裔冷清颼而雲舉體迅飛鴻傲若輕雲流睇橫波餘芳氤氲其度有則不顛不危優柔靡忒必兢必祇溫乎如玉暉兮陸離精采相授羌余其

悲於是川后斂颶冰夷却濤龍伯獻珠鮫人貢綃躍三  
蚪以拍塗蕤蒼芝而夾御雙螭帖其馴乘儼華旂之布  
濯鴛鴦嘯而先驅翡翠翼而齊驚於是趨彭蠡過洞庭  
洗月轂飛星輶流清聲而吐奇誦坤乾之大經畫三靈  
而不汨潛一意而長醒恍揚袂以如失雪微汎而霑纓  
拊佳期之不來日冉冉而西征復微素之孰寄誰其將  
余英瓊揚清波而微注拍潛淵而自驚恍精采之相授  
迄難陳其餘情於是游倦思歸路異神留遺思杳眇寤

寐好速蹇悠悠而何之拍寒川而薄憩蘭菲菲而襲余  
睇碧雲而搖曳信心會而神交豈綢繆之未契疎僕夫  
之傲余命速駕乎蘭柅其毋惑於所悅當陳古而為之  
制

水仙花賦

元  
任士林

眇伊人之蟬蛻兮宅清冷以為扉越蓬隔弱窅不知其  
幾千里兮跂余望之忽軒牕之翠碧兮見此綽約之芳  
姿曳青葱之華裾兮倚玉薤之披披逍遙清霜之夕徘徊

徊明月之辰佩乞碧霞衣紉綠雲金杯盥雨玉盤承津  
斟和注淳斟酌天均於時庭空人靜萬竅不作聲沉步  
虛之歌奏香鈞天之樂江妃具俎以進羞海若充賓而  
酬酢持杜鰭而未揚想堂中之歡樂余亦沈醺更酌接  
芳蕤而為客縱歌頽然不知天河之既落

水仙花賦

明姚綬

伊昔涪翁夙罹謫逐行邁阻修浮水奔陸方歸與以息  
駕乃燕坐於部屋惟是屋也依高山臨大江影薄高雲

聲飛怒瀧敞宇衡門洞乎八牕式遣懷於吟嘯忽有覩  
乎神姥爾乃乍近乍遙水面微步羅幘生塵綃裳沾露  
腰纖弱蘭肩冶樊素匪揚挂旗匪踊神魚遽引遽却或  
疾或徐袖翩翻兮婉婉帶繚繞兮紆舒悵數年之獨往  
鄙良夜以鰥居矯望延佇掠盼躊躇汎若斷梗浮猶馮  
虛乃若貼金蓮於玉趾眷茲樂胥於焉邇止瑪瑙坡荒  
仙王祠圯睇梅兄於嶺頭懷馨弟於澗溪進左右而諗  
之曰水上步月彼其仙邪惟炫素質不御鉛華中有金

卷一百二十一  
綈輕蒙臂紗衝斤暮雨揮霍朝霞爾或見之而豈吾之  
過誇邪左右屏息對曰彼之來斯誠類仙子馨香芬芳  
容光旖旎其綽約也儼藐姑之神其聯娟也齊洛川之  
子初雖瞻馳終莫摹擬是則主人之所見僕輩之所跂  
者也於是之時涪翁啞然而作聲彼人泯然而無迹江  
風惟清江月自白偃偃何之翳翳寢息晨興向明躑躅  
於庭忽幽花之托根依后土以降靈胡然生之太瘦歲  
晏流形宋玉招魂之賦莊周夢蝶之經翁適作詩調同



金石有頃比夕載驗厥跡無被花之懊惱出門一笑而  
橫大江之空碧

御定歷代賦彙卷一百二十一